

KANTON SARAJEVO**SKUPŠTINA KANTONA SARAJEVO****NAROD I PRAVDA****Arijana Memić, zastupnica****LJEKARSKA KOMORA KS****PREDMET: ZASTUPNIČKO PITANJE**

Zašto do sada nije sankcionisana generalna direktorica KCUS-a Prof.dr. Sebija Izetbegović, kao i 10 ljekara Pedijatrijske klinike i to: dir. discipline dr. Edo Hasanbegović, dr. Danka Pokrajac, dr. Zijo Begić, dr. Sniježana Hasanbegović, dr. Melika Melunović, dr. Feriha Hadžagić-Ćatibušić, dr. Ismeta Kalkan, dr. Verica Mišanović, dr. Meliha Sakić, dr. Sajra Užičanin (potpisi imenovanih u prilogu) koji su pisanom izjavom potvrdili da nisu htjeli preuzeti liječenje maloljetne pacijentice Nadin Smajlović, a također su (dr. Hasanbegović i nadležni među njima) uskratili saglasnost za izmještanje pacijentice na kliniku izvan BiH, iako su bili svjesni ozbiljnosti njenog zdravstvenog stanja te da izostanak i kašnjenje terapije može uzrokovati i smrtni ishod?

Da li će Ljekarska komora KS provesti postupak, shodno svojim nadležnostima, radi utvrđivanja odgovornosti navedenih članova Komore za povredu etičkog kodeksa ljekara i zakona koji utvrđuju prava i odgovornosti pacijenata u domenu zdravstvene zaštite, uključujući i preispitivanje opravdanosti mjere oduzimanje ljekarske licence ?

Obrazloženje

Na moje zastupničko pitanje od 23.04.2020. godine (Zašto nije sankcionisana generalna direktorica KCUS-a Prof.dr. Sebija Izetbegović, kao i 10 ljekara koji su odbili liječenje djevojčice Nadin Smajlović?) dostavili ste Skupštini KS odgovor od 06.05.2020. godine u kojem tražite dostavu dokumenta sa spornim stavom ljekara Pedijatrijske klinike KCUS-a te me obavještavate da „Ljekarska komora KS nije nadležna da ispituje rad zdravstvenih ustanova, nego svojih članova pojedinačno.“ Sličan odgovor o „nenadležnosti“ Ljekarske komore, na upit o istom slučaju, dostavili ste i porodici Smajlović.

Skenderija br. 5, 71000 Sarajevo E-mail: info@narodipravda.ba

Telefon: +387 33 860 860 ID: 420250518000 Šifra djelatnosti: 94.92

Račun br. Raiffeisen Bank: 1610000197720058

Shodno svemu navedenom, ističem da nisam zadovoljna odgovorom, odnosno da niste poduzeli ništa kako bi ispoštovali javni interes po ovom pitanju tj. interes građana da kao pacijenti budu zaštićeni od nesavjesnog rada pojedinih ljekara – članova Ljekarske komore KS. Nezadovoljstvo je tim veće jer se radi o slučaju vrlo poznatom i medijski eksploatiranom u BiH i inozemstvu tako da je neprihvatljiv stav da za slučaj niste znali i da niste djelovali shodno vašim nadležnostima i ovlaštenima i bez zahtjeva i inicijative izvan Komore. U vezi s navedenim u prilogu vam dostavljam (kao dokaze tvrdnji) traženi dokument sa potpisima ljekara Pedijatrijske klinike KCUS-a, koji su se izjasnili da ne žele liječiti malodobnu pacijenticu te link video-zapisa sa iskazom odgovornog lica KCUS-a, generalne direktorice Prof.dr. Sebije Izetbegović u kojem navodi da „niko ne želi prihvatiti liječenje“. Također, dostavljam i dio medicinske dokumentacije pacijentice Nadin Smajlović iz koje je vidljiv njen medicinski status. S toga ponavljam i dopunjavam svoje zastupničko pitanje.

Zastupničko pitanje odnosi se na opće poznati događaj iz novembra 2019. godine kada je pacijentica mladb. Nadin Smajlović hospitalizirana na Pedijatrijskoj klinici sa utvrđenom dijagnozom (Autoimuni hepatitis, Hashimoto tireoditis, Tuberkuloza jetre) i terapijom koja se nije mogla aplicirati na KCUS-u zbog nedostajućih lijekova i neiskustva Ljekarskog kadra sa ovom vrstom bolesti, čime je pacijentica ispunjavala uslove za izmještanje na dalje liječenje izvan BiH, a o trošku ZZOiR FBiH. Detalje o zdravstvenom statusu pacijentice i stavovima ljekara na Pedijatrijskoj klinici možete vidjeti u Otpusnom pismu i medicinskoj dokumentaciji (u Prilozima).

Osnov zastupničkog pitanja u ovom slučaju su činjenice (1) odbijanje ljekara da preuzmu liječenje pacijentice; (2) odbijanje generalne direktorice Izetbegović, dr. Ede Hasanbegovića i članova komisije za odobravanje izmještanja da odobre izmještanje i (3) javno objavljivanje podataka o bolesti pacijentice na zvaničnoj stranici KCUS-a. Ovim su zdravlje i život pacijentice ozbiljno dovedeni u pitanje, čega su bili svjesni imenovani specijalisti pedijatrije i generalna direktorica. U tim okolnostima došlo je do incidenta – prijetnji ljekarima Pedijatrijske klinike od strane oca pacijentice, zbog čega je isti procesuiran. Medicinsko zbrinjavanje pacijentice ostavljeno je na teret roditeljima, iako je, ponavljamo, pacijentica imala pravo na izmještanje o trošku ZZOiR FBiH, što su roditelji i učinili, a da se odgovorni na KCUS-u kasnije ni na koji način nisu interesirali za stanje pacijentice. Naprotiv, javne kritike zbog njihovog postupanja bili su razlog za mobing nad majkom pacijentice Aminom Smajlović, koja je uposlenica KCUS-a.

Smatramo da su imenovani ljekari postupanjem navedenom u zastupničkm pitanju prekršili: Zakon o zdravstvenoj zaštiti FBiH (Članovi 3 i 26), Kodeks medicinske etike i deontologije (Član 4, alineja 2 i 4, Član 5), a time i Pravilnik o odgovornosti članova Komore (Član 2 – kršenje etičkih principa propisanih Kodeksom).

Ljekarska komora KS u ovom slučaju morala je postupati u skladu sa ciljevima iz vlastitog Statuta i to posebno iz Člana 10 stav (1), Člana 11 stav (1) i (10), a pitanje opravdanosti oduzimanja licence, obzirom na kršenje Kodeksa, Komora bi morala razmatrati po Članu 11, stav (11) – izdavanje, obnavljanje i oduzimanje licence članovima.

Također, Ljekarska komora KS je morala na temelju nadležnosti propisanih Statutom Ljekarske komore KS poduzeti mjere za koje su u ovom slučaju nadležni Sud časti, Tužitelj i Branilac unutar Ljekarske komore KS čija je uloga propisana kroz članove Statuta (od Člana 40 do Člana 48) tj. istražiti slučaj, ispitati aktere i donijeti odgovarajuću mjeru definiranu u Članovima 69 i 70.

U istom kontekstu Ljekarska komora bila je dužna primijeniti odredbe Pravilnika o odgovornosti članova Komore te pokrenuti i voditi postupak protiv svojih članova u skladu sa odredbama Pravilnika (od Člana 4 do člana 34).

Kako to nije učinjeno inicijativom članova i organa Komore, inicijativu za pokretanje postupka utvrđivanja povreda dužnosti ljekarskog zvanja (temeljem Člana 7 Pravilnika) dostaviću vam izvan ovog zastupničkog pitanja posebnim aktom. Smatramo da su počinjena kršenja Kodeksa Ljekarske etike dovoljan osnov za donošenje najstrože kazne iz nadležnosti Suda časti.

Dokaz za to je činjenica da je po istovjetnoj proceduri za izmještanje pacijenta, a na temelju istih medicinskih pokazatelja koji su bili na raspolaganju i Pedijatrijskoj klinici KCUS-a, odluku o izmještanju donijela nadležna komisija za izmještanje Kliničkog centra u Tuzli (u Prilozima). Ovo je dokaz da su isto mogli učiniti i na KCUS-u znatno ranije i bez ugrožavanja života pacijentice, ali to svjesno nisu učinili kršeći etički kodeks struke i zakone. Napominjemo da je na prigovor roditelja Denisa i Amine Smajlović zbog javnog objavljivanja podataka o bolesti njihove mladb. Kćeri Nadin na web-stranici KCUS-a (a što je u suprotnosti sa zakonom o zaštiti ličnih podataka) Agencija za zaštitu ličnih podataka donijela Rješenje i naložila menadžmentu KCUS-a da ukloni podatke o bolesti pacijentice (Rješenje Agencije ZLP BiH u Prilozima).

Također, protiv odgovornih lica KCUS-a, Prof.dr. Sebije Izetbegović, menadžmenta i postupajućih ljekara sa Pedijatrije podnesene su krivične prijave Tužilaštvu KS, MUP-u KS i Općinskom sudu u Sarajevu zbog krivičnog djela iz Člana 232 (Nepružanje medicinske pomoći) i Člana 187, stav 1 KZ FBiH (Neovlašteno otkrivanje profesionalne tajne) te su ti postupci u toku.

Zahtjevam da Skupštini KS i meni dostavite odgovor na naznačena zastupnička pitanja.

Prilozi:

- Akt Discipline za zdravlje djeteta, Pedijatrijska klinika 1 i 2 od 28.11.2019.
- Iskaz generalne direktorice KCUS-a Sebije Izetbegović na linku:
<https://www.youtube.com/watch?v=YMhBaL8fnmw>
- Otpusno pismo s pedijatrijske klinike od 08.11.2019.g
- Akt Stručne komisije za upućivanje u inostranstvo KC Tuzla, broj: 02-62-38/20 od 25.03.2020. godine.
- Rješenje Agencije za zaštitu ličnih podataka BiH od 13.05.2020. godine

Sarajevo 19.05.2020.godine

Zastupnica u Skupštini KS

Arijana Memić